

陝西通志

第五
卷五
冊五

陝西通志第五十八卷

人物四

勇略上

周

樗里子名疾秦惠王弟滑稽多智秦人號曰智囊爵右更使伐曲沃取其城地伐趙虜將軍莊豹拔蘭明年助魏章攻楚敗楚將屈匄取漢中地秦封號爲嚴君武王立逐張儀魏章樗里子爲相以車百乘入周周迎之甚敬昭王元年樗里子伐蒲還擊皮子史記本傳

秦謂秦王曰山東之戰國有六韓天下之咽喉魏天下之胸腹

王資臣萬金而遊聽之韓魏入其社稷之臣於秦即韓魏從而天

下可圖也秦王曰善以資萬金使遊韓魏入其將相四國策

陳軫秦齊助楚攻秦惠王患之使張儀見楚王曰大王能閉關經齊

臣請使秦王獻商於之地六百里楚王大悅羣臣皆賀陳軫後至獨不賀楚王曰不穀得商於之地六百里諸大夫皆賀子獨不賀何也軫對曰臣見商於之地不可得而患必至也王曰何也對曰秦所以重王以王有齊也今地未可得而齊先絕是西生秦患北絕齊交兩國兵必至矣楚王不聽使受地於秦張儀出見使者曰從某至某廣從六里使者報楚王王大怒欲伐秦軫曰伐秦非計也王不如賂之一名都與之伐齊是我亡於秦而取償於齊也王不聽舉兵伐秦大敗於杜陵齊伐楚陳軫謂楚王曰王不如以地東解於齊西請於秦秦王謂軫曰子秦人也棄寡人事楚今齊楚相伐或謂救之便或謂救之不便子獨不可以忠爲子主計以其餘爲寡人乎軫曰王獨不聞夫管與之說乎有兩虎爭人而鬪管莊子將刺之管與止之曰虎者戾蟲人者甘餌今兩虎爭人而鬪

小者必死大者必傷子待傷虎而刺之則是一舉而兼兩虎也無刺一虎之勞而有刺兩虎之名齊楚今戰戰必敗敗王起兵救之有救齊之利而無伐楚之害計聽知覆逆者惟王可也

國策

司馬錯

秦人

與張儀爭論於惠王前司馬錯欲伐蜀張儀曰不如伐韓

王曰請聞其說對曰下兵三川以臨二周此王業也今夫蜀西僻之國而戎狄之長也敝民勞衆不足以成名得其地不足以爲利臣聞爭名者於朝爭利者於市今三川周室天下之市朝也而王不爭焉顧爭於戎狄王業遠矣錯曰不然欲富國者務廣其地欲強兵者務富其民欲王者務博其德今夫蜀西僻之國也戎狄之長也取其地足以廣國得其財足以富民繕兵故拔一國而天下不以爲暴利盡四海諸侯不以爲貪是我一舉而名實兩附而又

有禁暴正亂之名今周天下之宗室也韓周之與國也二國並力

合謀以因乎齊趙而求解乎楚魏臣所謂危不如伐蜀之完也惠王曰善卒起兵伐蜀十月取之

國策

錯孫靳事武安君白起與武安

坑趙長平軍還而與之俱賜死杜郵葬於華池靳孫昌為秦王鐵

官昌生毋惲毋惲為漢市長毋惲生喜喜為五大夫卒葬高門

漢書

司馬遷傳

犀首陰晉人名衍姓公孫氏相魏義渠君朝於魏犀首謂義渠君曰中國無事秦得燒掇焚扞君之國有事秦將使重幣事君之國其後五國伐秦會陳軫謂秦王曰義渠君者蠻夷之賢君也不如賂之以撫其志秦王曰善乃以文繡千純婦女百人遺義渠君義渠君致羣臣而謀曰此公孫衍所謂邪乃起兵襲秦大敗秦人李伯之下

史記張儀傳

公子池三國攻秦入函谷昭王欲割河東而講召池問之對曰講亦

悔不講亦悔王曰何也對曰王割河東以講三國雖去王必曰惜矣三國且去吾特以三城從之此講之悔也王不講三國入函谷咸陽必危王又曰惜矣吾愛三城而不講此不講之悔也王曰均吾悔也寧亡三城而悔無危咸陽而悔也寡人決講矣以三城講於三國兵乃退

戰國策

白起郢人善用兵事秦昭王爲左庶長擊韓之新城爲左更攻韓魏於伊闕斬首二十四萬拔五城遷爲國尉涉河取韓安邑以東到乾河爲大良造攻魏取城六十一與客卿錯攻垣城拔之攻趙拔光狼城攻楚拔鄢鄧五城明年拔郢燒夷陵遂東至竟陵遷爲武安君因取楚定巫黔中郡攻魏拔華陽走芒卯斬首十三萬與趙將賈偃戰沉其卒二萬於河中攻韓陘城拔五城斬首五萬攻南陽太行道絕之伐韓之野王野王降秦使王齕攻韓上黨上黨民

走趙因攻趙趙使廉頗將堅壁待秦秦相應侯使人行反間趙因使趙括代廉頗秦乃陰使武安君爲上將軍趙括至擊秦軍秦軍佯敗趙軍逐勝造秦壁堅拒不得入秦奇兵二萬五千絕趙軍後又五千騎絕趙壁間趙軍分爲二糧道絕秦出輕兵擊之趙卒不得食四十六日括自搏戰秦軍射殺括括軍四十萬降武安君盡坑殺之韓趙恐使蘇代厚幣說應侯言於秦王罷兵秦復發兵攻趙武安君稱疾楚使春申君及魏公子將兵數十萬攻秦軍秦王彊起武安君稱病篤於是免爲士伍遷陰密自殺武安君死非其罪秦人憐之鄉邑皆祭祀焉

史記本傳

王剪頻陽人少好兵事秦始皇十一年攻趙闕與破之拔九城二十八年攻趙遂拔趙盡定趙地爲郡明年攻燕遂定燕薊而還剪子賁擊荊荆兵敗還擊魏遂定魏地始皇問李信吾欲攻取荊度用

幾何人李信曰不過二十萬問剪剪曰非六十萬不可始皇使李
信伐荆荆人大破李信軍始皇自馳如頻陽謝剪剪曰不得已用
臣非六十萬人不可始皇曰聽將軍計於是王剪將兵六十萬東
擊荆荆悉國中兵以拒秦剪堅壁不肯戰日休士洗沐親與士卒
同食久之軍中投石超距剪曰士卒可用矣荆數挑戰秦不出引
而東剪舉兵追之大破荆兵至蘄南殺其將軍項燕乘勝畧定荆
地城邑爲郡縣因南征百越之君而王剪子王賁與李信破定燕
齊地始皇并天下王氏功爲多二世之時王剪及子賁已死陳勝
反秦秦使王剪孫王離擊趙項羽救趙虜王離

史記本傳

重泉人李必駱甲習騎兵可爲騎將漢王欲拜之必甲曰臣故秦民
恐軍不信臣願得大王左右善騎者傅之迺拜灌嬰爲中大夫令

李必駱甲爲左右校尉擊楚騎於滎陽東大破之

史記灌嬰傳

魏尚槐里人文帝時爲雲中守軍市租盡以饗士卒出私養錢五日一殺牛以饗賓客軍吏舍人匈奴遠避不近雲中之塞虜一入尚

帥車騎擊之所殺甚衆

漢書馮唐傳

蘇建杜陵人以校尉從大將軍衛青擊匈奴封平陵侯以將軍築朔方後以衛尉爲游擊將軍從大將軍出朔方後一歲以右將軍再從大將軍出定襄亡翕侯失軍當斬贖爲庶人其後爲代郡太守卒官有三子嘉爲奉車都尉賢爲騎都尉中子武最知名

漢書本傳

張騫城固人爲人強大有謀能涉遠爲武帝開西域五十二國窮河

源南至絕遠之國拜校尉從討匈奴有功遷衛尉博望侯至今方

外開通騫之功也

漢書士女志。按博望雖不以武功顯然奉使殊方宣揚威命開邊拓境之功不在武臣下也

自騫而後歷代使臣皆倣此

趙食其殺裨人武帝立十八年以主爵都尉從大將軍斬首六百六

十級元狩三年賜爵關內侯

漢書霍去病傳

辛慶忌字子正少以父任爲左校丞隨常惠屯田烏孫赤谷城與歙侯戰陷陣卻敵惠奏其功拜侍郎遷校尉將吏士屯焉耆國還爲謁者元帝初補金城長史轉校尉遷張掖太守徙酒泉所在著名成帝初遷左曹中郎將至執金吾坐子殺趙氏左遷酒泉太守歲餘大將軍王鳳薦慶忌通於兵事復徵爲執金吾數年坐小法左遷丞相司直後拜散騎給事中歲餘徙爲左將軍慶忌居處恭儉遭世承平匈奴西域親附敬其威信年老卒官長子通護羌校尉中子遵函谷關都尉少子茂水衡都尉出爲郡守皆有將帥之風慶忌狄道人徙昌陵昌陵罷留長安

漢書本傳

馮奉世字子明潞人徙杜陵武帝末以良家子選爲郎昭帝時失官

前將軍韓增奏以爲軍司空先是漢數使西域多辱命增舉奉世持節送大宛諸國客至伊修城時莎車攻劫南道鄯善以西皆絕不通奉世與其副嚴昌計以爲不亟擊之則莎車日強其勢必危西域遂以節諭告諸國因發其兵南北道合萬五千人進擊莎車攻拔其城莎車王自殺傳其首詣長安諸國悉平威振西域遂西至大宛大宛敬之得其名馬象龍而還上甚悅以爲光祿大夫水衡都尉右將軍常惠薨奉世代爲右將軍永光二年秋隴西羌反詔遣奉世將萬二千人以將屯爲名到隴西天子大發兵六萬餘人以助十一月羌大破斬首數十級餘走出塞明年二月奉世

還京師更爲左將軍

漢書本傳

王遵字子春霸陵人少豪俠有才辨與隗囂舉兵數勸囂遣子入侍囂不從故去焉八年來歙薨得畧陽公孫述助囂攻畧陽使遵持

節監大司馬吳漢遵知囂必敗而與牛邯舊故以書喻之邯歸命洛陽於是囂大將皆降囂恚憤死

漢書
囂傳

馮修字君游茂陵人更始時爲信都令與太守任光都尉李忠共城守迎世祖拜爲偏將軍封造義侯及破邯鄲拜右將軍從平河北建武二年更封槐里侯與揚化將軍堅鐔俱擊南陽未尅而病卒

後漢書
本傳

耿弇字伯昭茂陵人父況爲王莽朔調連率王莽敗更始立況自以莽所置不自安弇奉奏詣更始以求自固聞光武在盧奴乃馳北上謁因從光武北至薊會薊中亂光武南馳弇走昌平就况說况約彭寵發兵弇與寇恂景丹合軍而南擊王郎斬首三萬級定二十二縣遂及光武於廣阿光武以爲偏將軍從拔邯鄲時更始徵代郡太守趙永况勸永詣光武光武遣永復郡而代令張曩據城

叛光武以弇弟舒爲復胡將軍擊畢破之更始立光武爲蕭王令
罷兵時光武居邯鄲宮弇請問說光武乃拜弇爲大將軍北發幽
州兵擊銅馬高湖赤眉青犢又追尤來大槍五幡於元氏弇常將
精騎爲軍鋒輒破走之光武即位拜建威大將軍攻厭新賊大破
之建武二年封好時候三年延岑攻南陽弇與戰於穰大破之斬
首三千級岑遁走弇從幸春陵四年詔弇進攻漁陽弇與朱祐王
常等擊望都故安西山賊十餘營皆破之時祭遵劉喜拒彭寵寵
遣弟將匈奴二千餘騎經軍都舒襲破其衆况復與舒攻寵取軍
都五年寵死天子嘉况功使光祿大夫持節迎况封牟平侯遣弇
擊富平獲索賊大破之進討張步先擊祝阿進定濟南拔臨淄城
張步兵號二十萬弇示弱以盛其氣出戰自旦及昏大破之弇豫
置伏以待縱擊八九十里僵尸相屬齊地悉平六年西拒隗囂八

年從上隴明年與來歙分徇安定北地諸營保皆下之弇兄弟六人皆垂青紫當代以爲榮及况卒謚烈侯少子霸襲况爵十三年增弇戶邑年五十六永平元年卒謚曰愍侯子忠嗣忠以騎都尉擊匈奴於天山有功

後漢書本傳

耿國字叔慮

弇弟

建武四年初入侍光武拜黃門侍郎七年拜駙馬都

尉歷頓邱陽翟上蔡令所在吏人稱之徵爲五官中郎將時烏桓鮮卑屢寇外境國素有籌策數言邊事帝器之及匈奴薁鞬日逐王比自立爲呼韓邪單于欵塞稱藩願扞禦北虜議者皆以夷狄情僞難知不可許國獨以爲宜如孝宣故事受之令東扞鮮卑北拒匈奴帝從其議立比爲南單于由是烏桓鮮卑保塞自守中國少爭二十七年代馮勤爲大司馬又上言宜置度遼將軍左右校尉屯五原以防逃亡永平元年卒官顯宗後置度遼將軍左右校

尉如其議焉

後漢書耿弇傳

景丹字孫卿櫟陽人更始立爲上谷長史王郎起丹將兵南歸世祖拜爲偏將軍號奉義侯從擊王郎將兒宏等于南緣丹等縱突騎擊大破之追奔十餘里死傷者縱橫丹還從征河北世祖卽位拜丹爲驃騎大將軍建武二年定封櫟陽侯秋與吳漢耿弇等從擊破五校于薊陽降其衆五萬人會陝賊蘇况攻破弘農生獲郡守丹時病帝以其舊將欲令強起領郡事丹不敢辭乃力疾拜命將營到郡十餘日薨子尚嗣徙封余吾侯尚卒子苞嗣苞卒子臨嗣臨無子國絕永初七年封苞弟遽爲監亭侯

後漢書本傳

班超字仲升平陵人有志節爲官傭書常輟業投筆嘆曰丈夫當立功異域以取封侯安能久事筆研間乎後竇固出擊匈奴以超爲假司馬將兵別擊伊吾戰於蒲類海多斬首虜而還使西域鄯善

王廣奉禮甚備後忽懈超曰此必有北虜使來夜將吏士奔虜營順風縱火斬其使鄯善王震怖納子爲質固上功以超爲軍司馬令遂前功時于寘王廣德匈奴遣使監護其國超至于寘廣德素聞超在鄯善誅滅虜使大惶恐即攻殺匈奴使者而降超龜茲王建攻破疏勒立龜茲人兜題爲王超遣使劫縛兜題立故王兄子忠爲王肅宗即位詔徵超超至于寘王侯號泣抱馬脚不得行乃更還疏勒建初三年率疏勒康居于寘兵一萬人攻姑墨石城破之欲因此匡平諸國上疏請益兵平陵人徐幹願佐超五年以幹爲假司馬將千人就超先是莎車降於龜茲而疏勒都尉番辰亦反超與幹擊番辰破之八年拜超爲將兵長史幹爲軍司馬明年疏勒王忠反超攻忠後三年忠與龜茲謀遣使詐降詣超超叱吏縛忠斬之明年發于寘諸國兵復擊莎車莎車降明年龜茲姑墨

溫宿皆降乃以超爲都護徐幹爲長史超乃期大會諸國王於是西域五十餘國悉皆納質明年詔封超定遠侯超久在絕域上疏願入關超妹昭亦上書請超乃徵超還卒長子雄累遷屯騎校尉會羌寇三輔詔雄將五營兵屯長安就拜京兆尹

後漢書本傳

耿秉字伯初國子好將帥畧以父任爲郎數上言兵事永平中拜謁者僕射十五年拜駙馬都尉十六年與奉車都尉竇固等伐北匈奴虜皆奔走不戰而還十七年詔秉與固合兵出白山擊車師車師有前後王廷相去五百餘里固欲攻前王秉議先赴後王固計未決秉奮身而起衆軍遂進斬首數千級收馬牛十餘萬頭後王惶恐走出門脫帽抱馬足降秉將以詣固其前王亦歸命遂定車師而還明年秋肅宗即位拜征西將軍遣案行涼州建初元年拜度遼將軍視事七年匈奴懷其恩信徵爲執金吾章和二年復拜征